


Ua Faatonuina e Iosefa Samita le Korama a Aposetolo e Toasefululua e Faaauau le Galuega o le Malo.

Na faamaumuina e Peresitene Uilifoti Uitifafi (1807–98) le tala lea o loo faamatalaina ai le fonotaga na faia e le Perofeta o Iosefa Samita ma Aposetolo i le tautotogo o le 1844:



“Sa valaauina faatasi ai e Iosefa, le Perofeta a le Atua, ia le Au Aposetolo e Toasefululua . . . ma faaluina aso e tele faatasi ma i matou i le tuuina mai ia i matou o o matou faaeega paia, ma le aoaoina mai o i matou i na aoaoga faavae mamalu ia sa faaalua mai e le Atua ia te ia. Ma i se tasi o na taimi sa ia tu ai i ona aao i le lotolotoi o i matou e toeitiiti atoa le tolu itula, e folafola mai ia i matou le tisipenisione faaiu ma le maoae lea sa tuuina i ai e le Atua Lona aao ina ia faatinoina i luga o le fogaeleele i nei aso mulimuli. Ua faatumulia le potu e pei o se afi mumu; sa faaofuina le

Perofeta i le mana tele o le Atua, ma sa susulu ona foliga ma matua manino lava, ma sa ia faaiuina lena tautalaga, e le mafai-ona-galo i taimi uma ma le faavavau, i le gagana lenei:

“Uso e, ua ia te a’u se ootiaga loloto i lo’u loto ona o lo’u popole ina nei aveesea atu a’u ma le lalolagi faatasi ma ki o le malo o le Atua o loo ia te a’u, e aunoa ma le faamauina i luga o ulu o isi taitai. Sa faamauina e le Atua i luga o lo’u ulu ki uma o le malo o le Atua e manaomia mo le faatulagaina ma le fausiaina o le Ekalesia, o Siona , ma le malo o le Atua i luga o le fogaeleele, ma ia saunia ai le Au Paia mo le toe afio mai o le Atalii o le Tagata. O lenei uso e, ou te faafetai i le Atua ua ou ola ou te vaai i le aso ua mafai ai ona ou tuuina atu ia te outou faaeega paia, ma o lenei ua ou faamaufaailogaina i luga o o outou ulu ia mana uma o le perisitua Arona ma Mekisateko ma le galuega faaaposetolo, faatasi ma ki ma mana uma o iai, ia sa faamaufaailogaina e le Atua i o’u luga; ma o lenei ou te faataavaleina ese atu le galuega, le avega ma le tausiga o lenei Ekalesia ma le malo o le Atua i luga o o outou tauau, ma ou te poloaiina nei outou i le suafa o le Alii o Iesu Keriso ina ia tuufaatasi o outou tauau, ma tauaveina lenei Ekalesia ma le malo o le Atua i luma o le lagi ma le lalolagi, ma luma o le Atua, agelu ma tagata’ ” (*Aoaoga a Peresitene o le Ekalesia: Uilifoti Uitifafi* [2004], 20–21).

- O le a se mea o tulaga ese mai ia te oe i nei fuaiupu?
- Aisea na tatau ai mo Aposetolo ona umia ki o le malo o le Atua?

